

21 JUN 2002

Mahathir-Kelantan

LEBIH KOMITMEN PERLU UNTUK KEMBALIKAN KELANTAN KEPADA BN, KATA DR M

KUALA LUMPUR, 21 Jun (Bernama) -- Barisan Nasional (BN) akan hanya dapat memerintah Kelantan semula jika anggota Umno negeri itu melipat-gandakan komitmen untuk tujuan ini, kata Perdana Menteri yang juga Presiden Umno Datuk Seri Dr Mahathir Mohamad.

"Mungkin komitmen ini akan datang hanya apabila pemimpin Umno Kelantan, termasuk ketua-ketua bahagian dan anggota parti, disuruh bersumpah atas al-Quran untuk memberi komitmen mereka untuk mengambil balik Kelantan," katanya.

Dr Mahathir berkata anggota Umno Kelantan perlu mengutamakan kemenangan parti daripada kemenangan individu apabila pilihan raya umum diadakan.

"Kalau semua bagi komitmen itu, kita BN boleh menang di Kelantan. Orang Kelantan bukan suka PAS tetapi orang Umno sendiri yang tidak bekerja keras dan hanya mahu berebut-rebut untuk mendapat jawatan. Itulah yang tidak disukai oleh rakyat Kelantan," katanya.

Dr Mahathir berkata demikian pada jamuan malam anjuran Umno Kelantan di kediaman rasmi Ketua Perhubungan Umno Kelantan Datuk Mustapa Mohamed. Majlis itu dihadiri lebih 2,000 anggota Umno negeri.

Perdana Menteri berkata beliau hairan kenapa Kelantan masih ditangan parti lawan sedangkan banyak usaha telah dilakukan untuk menarik pengundi negeri itu balik ke pangkuan BN.

"Pada tahun 1999, Datuk Ibrahim (Datuk Ibrahim Ali, ketua bahagian Umno Pasir Mas) telah berkata kepada saya yang BN akan dapat mengambil balik Kelantan tetapi kita kalah teruk...saya dah give-up dah," katanya.

Perdana Menteri membuat perbandingan Umno Kelantan seperti negara Perancis yang kalah kepada Senegal pada kejohanan Piala Dunia yang sedang berlangsung di Korea dan Jepun ketika ini.

"Dah tiga kali Ibrahim salah dan saya betul (mengatakan Kelantan tidak boleh dikuasai oleh BN). Mungkin kali keempat Ibrahim betul (dapat mengembalikan Kelantan kepada BN)," katanya lagi.

Dr Mahathir berkata beliau sanggup berdiri di atas kepalanya jika Umno dan BN dapat merampas balik negeri itu daripada cengkaman PAS pada pilihan raya akan datang.

Katanya beliau merasa anggota Umno Kelantan kurang sayangkan Umno tetapi lebih sayangkan individu tertentu dan itulah sebabnya kenapa BN tidak dapat memerintah negeri pantai Timur itu semula.

"Mengutamakan individu daripada parti adalah tidak baik. Bila kita letak calon, orang lain tak seronok. OKlah kalau yang tak puas hati balik rumah tidur, tetapi ini tidak, dia cuba sabotaj pulak," kata Dr Mahathir.

-- BERNAMA

SR MSL LAT